

40 HARI MENJELANG SUKAN SEA

Merah tanda sokongan bagi Team Singapore

DPM Teo: 'Peluang hebat' bagi warga bersatu

► **NORMAN SAWI**
normans@sph.com.sg

TIDAK lama lagi kawasan perumahan dan tempat awam di serata Singapura akan 'diselimuti' bendera dan kain rentang merah menyala; sebagai tanda sokongan kepada atlit Team Singapore yang bakal bertanding di Sukan Asia Tenggara (SEA) Jun nanti.

Lebih 300 bas, 250 teksi dan tiga keretapi pula telah dihiasi dengan pelekat Team Singapore.

Anda juga akan diperkenalkan kepada atlit Team Singapore yang tinggal di kejiranan sama.

Poster pemain bola sepak Faris Ramli kini ditampal di kejirannya di Pasir Ris; sementara kain rentang menunjukkan penda-yung Saiyidah Aisyah Mohamed Rafa'ee bakal digantung di tiang lampu di Woodlands.

Dilancarkan di Pasir Ris West semalam, kempen 'Paint the Town Red' ini adalah inisiatif kemasyarakatan terkini oleh jawatankuasa penganjur Sukan SEA (Singsoc) bagi menggesa warga memberi sokongan kepada atlit setempat.

Melancarkan inisiatif itu di padang di depan blok 569 di Pasir Ris Street 51, Timbalan Perdana Menteri, Encik Teo Chee Hean, meluahkan harapan agar warga memberi sokongan kepada atlit setempat di temasya sukan dwitahunan ini.

"Saya kenal pelari pecut Calvin (Kang) dan keluarganya; keluarga Sheik Alau'ddin (Yacoob Marican) yang bergiat dalam silat; dan saya melihat bagaimana pemain hoki Haseef Salim menjadi matang sejak Su-

kan Olimpik Belia (YOG).

"Adalah hebat jika warga ghairah menyambut Sukan SEA, terutama jika tahu atlit yang mengambil bahagian adalah rakan dan jiran," kata Encik Teo yang juga Penasihat Akar Umbi kepada GRC Pasir Ris-Punggol.

Tambahnya, Sukan SEA 'peluang hebat' bagi warga bersatu dan meraikan ulang tahun ke-50 negara (SG50); dengan memberi sokongan kepada atlit.

"Kalah atau menang tidak begitu penting... mari kita tunjukkan semangat Singapura," katanya.

Pesilat nasional Sheik Ferdous Sheik Alau'ddin, seorang penduduk Pasir Ris berkata:

"Saya berasa bersemangat kerana tahu jiran dan warga sentiasa memberi sokongan."

Inisiatif ini juga bakal dilanjutkan ke kawasan bandar; merangkumi bangunan bersejarah seperti Balai Polis Lama Hill Street dan Taman Warisan Melayu

Ketua jabatan bagi mendekati masyarakat dan korporat Singsoc, Encik Toh Boon Yi, menggesa

warga mengenakan pakaian merah sepanjang tempoh Sukan SEA dari 5-16 Jun nanti.

Selain di Pasir Ris, 14 lagi estet perumahan; antaranya termasuk Sembawang, Tanjong Pagar, Tampines dan Jurong akan diwarnai merah secara berperingkat, sepanjang bulan depan.

Sekitar 600,000 penduduk telah menyertai kegiatan kemasyarakatan Sukan SEA setakat ini, dengan beberapa acara lain dijadualkan, seperti pesta Sukan SEA ActiveSG dan acara Nila Run, Nila Swim.

Keterangan lanjut boleh diperolehi di www.sea-games2015.com.



MERAH MENYALA: Atlit Team Singapore (dari kiri) Jowie Tan dan Sharifah Badriyah Syed Alhadad (floorball); Calvin Kang (atletik) dan Sheik Ferdous Sheik Alau'ddin (silat). – Foto TUKIMAN WARJI